

TE HUIHURAA API

I neia i te piha neneiraa na te Ekalesia a Iesu Mesia i te Feia
Mo'a i te Mau Mahana Hopea Nei i Papeete, Tahiti.
i te mau fenua Sotaiete, i te mau avae atoa.
Te hoo e piti farane i te matahiti hoê.

Nu. 9.

Setepa 1929.

Mat. 23.

*"I mua'tu i te taeraa mai no te mahana rahi no te Fatu
ra, e ruperupe o Iakoba i roto i te medehara; e tiarehia hoi
te ati Lamana mai te rotî ra. E ruperupe o Ziona i nia i te
mau aivi, e oava hoi i nia i te mau mou'a, e haaputuputu mai
hoi ratou i te vahi ta'u i haapad.'" B. F. 49:24.*

Te Faaroo no te Feia Mo'a Mau.

Ua iritihia teie nei parau na roto mai i te buka: "Te Hiro'a Faaroo"
tei papaihia e Tamate Aposetolo; Faaauhia ei reo Tahiti e Elita.

HIRO'A FAAROO 10. *Te faaroo nei matou * * * **
E faatihia Ziona i nia i teie nei fenua (i Amerika).

(E tuatiraa teie nei parau.)

ZIONA

UIRAA 1. Ehia vahi putuputuraa i parauhia i roto i te
parau moá?

P. I te tahi mau vahi ta tatou i haapii aé nei ua taió
tatou i te mau parau no Ierusalema o tei faatia faahcu-hia, e
Ziona o tei faatihia i te mau mahana hopea nei. No reira,
te vai ra e piti vahi no te putuputuraa, oia hoi Ierusalema,
e Ziona.

Parau tauturu: I te tahi mau taime ua parauhia Ierusalemalema i Ziona no te hoé aivi i roto i taua oire ra o te parauhia Ziona, area râ i vetahi ê mau vahi ua faataa-maitai-hia taua na vahi ra. Ua faaite maira Mika e, “E arotehia Ziona mai te aua i arotehia ra ia outou; e e riro Ierusalemalema ei puea”. (Mika 3:12) No te oire ra Ierusalemalema e te mouá ra Ziona to roto, taua parau nei e ua ite tatou i te tupuraa o te reira i te taime i arotehia te aivi e te nuu Roma i to ratou imiraa i te faufaa. I muri mai râ i ta’na ra parau nei ua na o maira oia e, e faatiahia te moá o te Atua e e parauhia oia i Ziona, e “Na Ziona’tu hoi te ture i te revaraa’tu, e te parau na Iehova, i na Ierusalemalema’tu ia” (Mika 4:1-2) I taua vahi nei ua faataahia Ierusalemalema e Ziona o te faataahia i te tau hopea ra.

Ua na ô maira Ioela e, “E uâ mai hoi Iehova i Ziona e haapuroro mai oia ta’na reó i Ierusalemalema.” (Ioela 3:16) Ua faataa atoa Zephania i taua na vahi ra mai te parauraa mai e; “Ia tae i taua anotau ra e parauhia’i Ierusalemalema, Eiaha e mataú; e o Ziona, Eiaha e toaroaru to rima.” (Zephania 3:16)

I te taime e ineine ai te utuafare o Iakoba no te taeraa mai o te Faaora, e ua haaputuputu mai to Iseraela; ei reira e faatiahia na vahi e piti, oia hoi Ierusalemalema i te pae i te hitia o te râ, e Ziona i te pae i te toaa o te râ, oia hoi i Amerika.

Uiraa 2. Eaha ia te auraa o te i’oa ra Ziona?

P. Te hanahana ia to’na auraa i te reó Heleni i te mata-mua roa ra, area râ ua moé te reira na roto i te auraa rahi e te maitai no te hoé vahi. Te vaira e toru vahi i parau-noahia i Ziona, oia hoi:

1- Te aivi i roto i Ierusalemalema e i teie nei ua amuihia Ierusalemalema atoa i roto i te reira auraa.

2- Te oire rahi te parauhia Ziona o te faatiahia i te

tau hopea ra mai ta Mika i parau mai ra. E ua faaite atoa maira te heheuraa apî i teie nei ui i te tahi vahi i parauhia Ziona' oia hoi.

3- Te Oire Moá ta Enoha i faatia e teirave-ê-hia'tu i te raí.

4- Te vai atura te tahi auraa no te reira i'oa, e ere râ te i'oa no te vahi; e i'oa râ ia no te Ekalesia a Iesu Mesia, oia hoi, mai ta'na i parau mai *Tei Mâ te Aau*.

Uiraa 3. Eaha te auraa no te I'oa ra *Ierusalem*?

P. Teie to'na auraa, maori râ te *Niu* e aore râ te *Oire no te hau maru*.

Parau Tauturu: I te tau no Aberahama ua parauhia taua oire ra i Salema. I muri mai ua riro taua oire ra ei oire hanahana e te oire no te hielô e te arii i te tau no Davida raua o Solomana.

E rave rahi te mau ati tei tae i nia iho ia'na, e ua pau oia ia Nebukanesa, faatia-faahou-hia ihora oia i te hopea no te faatîti-raa-hia o Iuda e to Babulonia. E te tahi atoa i te tau no Roma i pau faahou ai oia ra. Ua riro taua oire ra ei oire moá roa i to Iuda'toa e i teie nei â ua ferurihia e, e oire moá iho â te reira. Tei reira te rahiraa o te mau ohipa na te Faaora e i reira To'na poheraa e To'na tia faahou-raa.

Noa'tu râ to'na rahiraa e to'na hanahana i te tau tahi to te vai atura te taima e hanahana hau aé oia i te reira, oia hoi i te taima e arii ai Iesu i nia iho i te ao nei.

Uiraa 4. I hea Ziona e faatiatia'i?

P. I roto i te Bibilia aita te vahi i faaite-papu-hia maori râ te vai ra te tahi mau vahi tei haapapu mai ia tatou i te huru no taua vahi ra. "E riro ia tae i te mau mahana hopea ra, e faatiatia'i te mouá ra o te fare o Iehova i nia i te tupuai mouá, e faateiteihia ia i nia i te mau aivi: e tairuru atoa mai te mau etene i reira. E rave rahi te fenua e haere, a parau-

ai e, E haere mai, e haere tatou i nia i te mouá o Iehova, i te hiero o te Atua o Iakoba; e na'na e haapii mai ia tatou i to'na haapaoraa, e haere tatou na te eá ta'na e faaite maira; na Ziona'tu hoi te ture i te revaraa'tu, e te parau a Iehova, i na Ierusalema'tu ia." (Mika 4:1-2) Ua na reira atoa maira Isaia i te pene 2:2-3. E te faaite faahou mai nei oia e, e faatia te Atua i te reva i nia i te mouá; A hió i roto i te Isaia 18:1-3.

Ua na reira maira hoi te mau peropheta tei noho i te fenua Amerika i mutaa ihora, e ua faaitehia ta ratou parau i roto i te Buka a Moromona. Ua pãpũ rii â râ ta ratou parau i te faaiteraa e, ei taua fenua ra, (i Amerika) e faatiahia Ziona, oia hoi te Ierusalema Apĩ no te mau tau hopea ra.

Ua na ô maira Moroni i to'na haapotoraa i te parau na Iareda e; "Faaite atoa'tu oia e, e fenua teie no te Ierusalema apĩ, te tae mai no te rai mai, e no te Vahi moá o te Fatu. Inaha, ua itea ia Etera te mau mahana no te Mesia, e ua parau oia i te parau na te hoé Ierusalema Apĩ i teie nei fenua ra; Ua parau atoa hoi oia i te utuafare no Iseraela, e te Ierusalema no reira mai Lehi; e ia pau roa te reira, e faatia-faahou-hia ia ei oire moá i te Fatu, no reira aita e tia ia parauhia i te Ierusalema Apĩ, i vai hoi ia i te anotau tahito ra, e faatia-faahou-hia râ ia, e e riro ei oire moá no te Fatu; e e faatia-hia ia no te utuafare o Iseraela; E e faatiahia te hoé Ierusalema Apĩ i nia i teie nei fenua, no te toea o te huaai o Iesopha, e taipe hoi to te reira mau mea ra; (Etera 13:3-6)

No reira mai te au i te mau parau papai na papu ia tatou e, ei te fenua moá Ziona e faatiahia'i, e o Amerika mau iho â ia.

Parau Tauturu: Ua parauhia hoi te oire o Enoha i Ziona mai ta tatou i haapii i te uiraa e te pahonoraa numera 2. E ua na ô maira Ioane e: "E ite atura hoi au, o Ioane, i te oire moá ra, ia Ierusalema apĩ, i te pouraa mai mai ô ma¹

i te Atua i nia i te raí ra, ua faanehenehehia mai te vahine i faanehenehehia no te faaipoiporaa i ta'na tane ra." (Apokalupo 21:2) Ua papu ia tatou no te oire moá o Enoha taua tufaa no Ierusalema apí nei no te mea ua ravehia oia e to'na oire atoa i te raí ra i pihai iho i te Atua. Buka Poë Taoá Rahi Mose 7:69.

Ua na ô maira te Atua e, o te Feia paran-tia ia Ziona. Buka Fafau 97:21; e i te taima e tae mai ai te oire ta loane i ite e amui-atoa-hia ia i te Feia Parau-tia i te oa nei e e riro ratou atoa ei Ziona rahi e te nehenehe.

Uiraa 5. I roto i teihea tufaa i Amerika, Ziona e faa-tiahia'i?

P. Ua parauhia Amerika atoa, oia hoi Amerika Apatoa e Amerika Apatoerau i Ziona; area râ ua faataahia te vahi no te oire rahi e te hieo rahi na roto i te heheuraa i te matahiti 1831, e tei te mataenaa ra i Iakasoni i te tufaa fenua Missouri i te fenua Amerika Apatoerau taua vahi ra.

Parau Tauturu: Ua na reira maira te haapiiraa na te Ekalesia. Te vai ra te mahana e na reira'i ratou i te faatia i taua oire ra, area râ mai to Iseraela te huru, ua maoro te taima i ropu i te iteraa i te maitai e te tupuraa i te reira. I roto i taua area ra te putuputu mai nei te Feia Moá i te tubuai moá i Amerika, e i reira to ratou faatiaraa i te mau hieo ei faaineineraa no taua mahana rahi roa ra, e te ô atoa mai nei te mau nunaa e rave rahi i reira mai te parauraa, "E haere mai, e haere tatou i nia i te mouá o lehova, i te fare o te Atua o Iakoba; e na'na e haapii mai i ta'na haapaoraa, e haere tatou na te eá ta'na e faaite maira." (Isaia 2:3)

(Tuatibia teie nei parau.)

Te Ao Varua.

I roto i te vea no te avae Febuare, ua nenehia te hoé parau i raro aé i te upoo parau e, "E HAERE TEI POHE I HEA?". Ua faatupu paha taua parau rii ra i te manaó e, o Paradaiso ia te faaearea no te mau varua atoa a pohe ai ratou ra.

Na roto i to tatou taióraa i te hoé mau parau i roto i te Bibilia Moá, e tae iho â to tatou mau manaó i nia i te reira vahi. I feruri râ tatou i nia i te auraa mau o te parau Paradaiso, e ia haapii hoi tatou i te mau parau papai e te moá hoi, e ite tatou e, o Paradaiso ia te hoé tufaa i roto i te Ao Varua. Noa'tu e, i roto i te parau o to te ao nei ua parau-noa-hia Paradaiso te faaearea o te mau varua i ropu i te pohe e te tia-faahou-raa, mai te faataa ore i tei maitai e tei ino.

A taió ai ra tatou i te tahi mau vahi, ei reira tatou e ite e, o Paradaiso ia te faaearea no te parau tia anaé. E aore râ ia feruri â tatou i nia i te taata êia o tei tatarahapa i mua ia Iesu i te taima i faasataurohia'i raua o Iesu, Luka 23:43, ua tia ia tatou ia manaó e, ua tae iho â taua taata êia nei i Paradaiso, oia hoi te faaearea no te mau varua maitai. O vai tei ite i te faufaa mau o to'na tatarahapa, maori râ te Mesia o tei faasataurohia i pihaiho ia'na ra? Aita e nehe-nehe ia tatou ia manaó e, ua ineine taua taata hara nei ia farii i te tiaraa teitei i to te Atua ra Basileia e te tia-faahou-raa, area râ ua ite oia i to'na mau hape hou oia i pohe ai e ua au ia to'na aau no te fariiraa i te parau a te Atua e te ravea ia ora. I roto i te Corinetia 12:4: e i te Apokalupo 2:7, te vai ra ia na irava o tei tauturu ia tatou i to tatou imiraa i te huru mau o Paradaiso ra, e i te faataaraa hoi i te mau varua ino e te mau varua maitai.

A taió atoa tatou i ta Petero parau, a na ô mai ai oia

rae, "I pohe na hoi te Mesia iho no te hara hoé poheraa, te taata parau tia no te feia parau tia ore ia tae tatou ia'na i te Atua ra, i taparahi-pohe-mau-hia oia i te tino ra, i faaorahia ra e te Varua: o ta'na ia i aó atu i te mau varua e vai i roto i te tapearaa i teie nei; o tei ore i faaroo i mutaihora, i te faaoromairaa o te Atua a tia ai i te anotaui Noa ra, i te tarairaa i te pahi ra, i ora'i e toofanu pue taata i te moana, oia hoi na taata toovau ra." I Petero 3: 18-20. I roto i taua parau nei, ua faaite papu maira Petero e, ua haere te Mesia i te mau varua i roto i te tapearaa o tei haapao ore i te tau no Noa, a tarai ai oia (Noa) i te pahi ia ora na taata toovau. Ua faaite-hua-hia te parau no nia i te mau taata i tei ati i te diluvi, no te mea, e hohoá ratou no te mau taata hara'toa, no ta ratou mau ohipa tia ore. ua haamouhia ratou. I reira atoa hoi ua faaitehia mai, te vai noa te vahi tapearaa i roto i te Ao Varua.

E tatou o tei titau papu i te ite mau i nia i te reira vahi, e tae ia taió tatou i roto i te Buka a Moromona, o tei horoahia mai e te Atua i to te ao nei na roto i te Peropheta o Iosepha Semita. Ua parau maira te Peropheta o Alama na ô maira, "E teie nei, te parau no te vairaa o te varua taata i ropu i te poheraa e te tia-faahou-raa: Inaha, ua faaitehia mai ia ia'u e te hoé melahi, o tei na ô mai ia'u e, la reva'tu te varua o te taata i teie tino pohe noa nei; oia ia, te varua o te mau taata atoa ra, te taata maitai e te ino atoa hoi, ua afaihia ia ratou i taua Atua ra o tei horoa mai i te ora ia ratou ra. Ei reira e farihia te varua o te feia parau tia ra i roto i te hoé vairaa mauruuru ra, o tei parauhia Paradaiso; e vahi faaearaa ia, e te hau, ei reira i faaea'i ratou i to ratou peapea, e te ati, e te oto hoi. Ei reira te mau varua o te feia parau ino e te viivii; inaha hoi, aita o ratou e tufaa i te varua o te Fatu; inaha hoi, i maiti ratou i te ino, aore i te maitai; no reira i ô ai te varua o te diaboló i roto ia ratou e ua rave i to ratou tiahapa; e e hurihia ia ratou i te poiri

ra, tei reira te oto, e te tai, e te auauraa niho; e ua na reira, no ta ratou iho ohipa ino, i aratai-titi-hia hoi ratou e te hinaaro o te diabololo. E teie nei, o te vairaa teie o te varua o te taata ino; oia ia, tei roto i te pōiri ratou, e te hoé vairaa riáriá, e te mataú, e te manaóráa i te mainaina uána e te riri o te Atua, o te tae i nia ia ratou; e na reira noa ratou i te vairaa, e o te reira atoa te vairaa o te feia parau tia i roto i te paradaiso e tae roa'tu i to ratou tiafaahou-raa." Alama 40:11-14. Te vai atoa ra te tahi mau tanturu i roto i te II Nephi 9:13; e i te IV Nephi 14; e i te Moroni 10:34.

A parau-noa-hia'i Paradaiso te faaeearaa o te mau varua i muri'ho i te poheraa, ia manaó tatou e, o te Ao Varua ia te vahi rahi no te mau varua atoa e tia'i, e ua tatufaahia te Ao Varua i roto i na tufaa i au no te mau varua o tei tae i reira.

Te parau Paradaiso no roto mai ia i te reó Heleni, (Persian) e te auraa o taua parau nei o te hoé ia vahi faaeearaa oaoa. E ua aó Iesu i te evanelia i te mau varua i Paradaiso e i te mau varua i te tapearaa hoi, i te evanelia te opuaraa no te ora. Ia ineine hoi ratou no te haavaraa hopea i mua i te aro o te Atua ra e tia'i.

— *Papaihia e Toma*

Petero E Ta'na Mau Taeae.

Na roto i te horoaraa mai o te Varua Maitai ua riro te mau Aposetolo ei mau taata feaa-ore e te paari. Ua haere ratou i te raveraa i ta ratou mau ohipa mai te mana e te puai atoa hoi. Aore ratou i mataú. Hió atura Petero i te hoé taata pirioí i te pae uputa o te hiero, parau atura Petero ia'na na ô atura, "Aita au ario e te auro, e tau ra e vai nei, o tau

ia e horoa'tu na'oe: A tia oe i nia a haere i te ióa a Iesu Mesia i Nazareta ra".

Ua ora ihorate pirioí e ua maere roa te mau taata, e pae ia tautani ra. Aó atura Petero ia ratou i te na ô raa'tu e, "Na te Atua o Aberahama, e o Isaaka, e o Iakoba, na te Atua o to tatou hui tupuna ra i haamana i ta'na Tamaiti ia Iesu, o ta outou i pupu nei, e ua faarue i mua i te aro o pilato, ia'na i mârô ra e, e tuu. Faarue iho nei ra outou i te Taata Moá e te Parau-Tia ra, e ani atura hoi i te taparahi taata ia tuuhia mai ia outou na, taparahi iho nei hoi i te tumu o te ora, i ta te Atua i faatia mai te pohe maira, o matou nei a hoi te ite. Na'na i faaetaeta i teie nei taata i te faarooraa i to'na i'oa, i ta outou e hió nei, e ta outou hoi i ite nei: oia ia, na te faaroo hoi ia'na i roaa ai ia'na teie nei ora rahi mau i mua ia outou atoa nei.

Ua ite papu Petero, aore teie mau taata i ite i te hara rahi ta ratou i rave aé nei, oia hoi te taparahiraa o Iesu Mesia. No reira ua aroha atu oia ia ratou e ua na ô atura ia ratou, "E teie nei, e tatarahapa outou, e e fariu mai, ia paraihia ta outou hara, ia itea mai te anotau haumaru no ô mai i te aro o te Fatu ra;"

A faaroo aéra te mau tahuá rahi no te hiero i taua parau ra, haru ihora ratou ia Petero raua Ioane, afai atura i te fare tapearaa ia tia i te haavaraa i te poipoi.

Poipoi aéra ua arataihia raua i mua i te haava. Ui maira te haava ia raua nohea mai to raua mana ia rave i teie mau ohipa. Pahono atura Petero ia'na na ô atura, "E te mau tavana o te taata, e te feia paari o Iseraela nei, oia hoi teie, te haavahia nei mau i teie nei mahana i te maitai i tuuhia'tu i te taata paruparu i te mea i ora'i oia: ia ite mai outou atoa, e te taata atoa o Iseraela nei e, no te i'oa o Iesu Mesia Nazareta, ta outou i faasatauro iho nei, o tei faatiahia e to Atua mai te pohe maira, no'na i tia'tu ai teie nei taata i mua i to outou aro ma te maí ore nei. O te ofaí teie i faa

ruehia e outou e te feia patu fare, e ua riro iho nei ei ofai tia-vâ. Aore roa hoi e ora ia vetahi e, aita'tu hoi e i'oa i faaite-hia mai i te taata i raro a'e i teie nei raí e ora'i tatou nei."

A faaroo aéra te mau tahuá i teie nei parau riri ihora ratou no te mea aita te ohipa a Iesu i pohe i te taime i taparahai ai ratou ia'na. E no reira ua faaue atura ratou ia Petero ma eiaha roa ratou e parau faahou i te i'oa a Iesu Mesia. Pahono atura Petero ia ratou na ô atura, "E mea tia i te Atua ia faaroo atu ia outou eiaha i te Atua, a haamanaó iho ia outou. E ore hoi matou e tia ia ore ia parau i ta matou. i hió aé nei, e ta matou i faaroo aé nei.

Na roto i taua mau parau a raua ra ua ite te mau tahuá e, eita ta ratou e ravea ia raua. No reira ua parau atura ratou i te man parau ei haamataúraa ia raua, e tuu atura ia raua ia haere.

Tupu ihora te Ekalesia i te rahiraa, te amui-noa-hia maira te taata i te mau mahana atoa.

Feii faahou ihora te tahuá rahi ia raua e ua faaue oia i ta'na mau taata ia tuu faahou ia raua i te fare tapearaa, e ua na reira-hia.

Na roto ra i te mana o te Atua ua paruruhia raua ia nenehe ia raua ia poro haere i te evanelia a Iesu Mesia i taua mau mahana ra.

Na roto i teie nei parau ua ite ia tatou i te huru o te Ekalesia i te tau no te mau Aposetolo. Ua haamanahia ratou ia rave i te mau ohipa na roto i te i'oa o Iesu Mesia.

I teie nei anotau hopea nei tei te Ekalesia a Iesu Mesia i te Feia Moá i te mau mahana hopea nei, taua mana ra. Te vai nei te mau Aposetolo i roto i ta'na Ekalesia e hoé â to ratou mana i to te mau Aposetolo i te tau tahito. Te farii nei matou i te mau mea atoa ta Iesu i haapii, no te mea te faatere-noa-hia nei te Ekalesia e ana.

A hiópoa maitai outou, o tei hinaaro i te parau mau, i te mau haapiiraa a te Ekalesia a Iesu Mesia, e pure outou i te Atua ia tauturu mai ia outou i te imiraa i te parau mau.

Papaiaha e Gihoti Borobiti.

Te Mau Parau Apî

Ua tae mai e toru orometua apî na nia mai i te pahi vea no Tiulai. O Amona, e o Teana, e o Lelani ia to ratou mau io'a. E riro atoa ratou i te tauturu i te ohipa evanelia i teie pae ao moana nei.

Ua riro te rê no te ao atoa nei i te hoê pahi reva Marite no te maue-maoro-noa-raa, mai te ore roa e tapae e tae noa'tu 174 hora e 44 minuti, e aore ra e 7 mahana e tiahapa. E ua na ô maira te feia no taua pahi ra, ahiri aita raua i roohia i te rohirohi rahi ra, ua tamau noa ia raua, no te mea te maitai noa ra to raua pahi. Te Oire o Celevelani (City of Cleveland) to'na ioá.

Ua tamata faahou te tahi na taata apî Amerika ihoâ i te tapiri i te taime no te Oire o Celevelani, e no to raua itoito e te maitai hoi o to raua machine ua maue noa raua e 246 hora e 43 minuti, oia hoi 10 mahana e tiahapa to raua maue noa-raa. Ia fatata te mori i te pau ua taniuniu atura raua, e ua afai mai te tahi pahi i te mori no to raua pahi. Iroto i teie na mahana 10 ra, ua faaî-faahou-hia to raua pahi e 36 taime i te mori. E ua ani atura i te 37 o te taime, aita ra i tae ia raua no te mea ua ino te airo no to raua pahi e na te reira i faahoi mai ia raua i raro e ua fatata raua i te pêpê i te taperaa. Ua hiôpoahia raua e te mau taote e ua maere hoî ratou i te maitai o na tino no teie na taata i muri'ae i te hoê tamataraa mai te reira te huru. Ua opua papu ra raua e, e maue raua e tae noa'tu e 300 hora, aita ra te pahii faatia. O Aneteleno (Angeleno) te io'a no to raua pahi.

Te opua nei te hoé taata, e 24 to'na matahiti, i te tere mai Niu Yoka e tae roa'tu i Pari Farane, na nia i to'na poti hôehôe, e 16 avae anaé te roa. Te vai ra te hoé machine tapiri e te hoé îe nainai i nia i taua poti ra, e taua taata ra o Davida to'na io'a. Oia anaé ra to nia i to'na poti, e te manaó nei oia e, ia afaro rii te mataí, e tae roa oia i Pari i roto i na avae e piti.

E ati rahi apî tei itehia i te maueraa'tu o na taata Farane mai Niu Yoka Amarika e tae noa'tu i Pari Farani na nia i te hoé pahi reva o tei parauhia Te Manu Rearea. Ua haamata atura te tere o teie mau taata mataú ore i te pohe, e ua atea atura ratou, te teiaha ra te airo o te pahi, farui atura te hoé i muri, mai te imi i te peapea. E inaha ua ite oia i te hoé Tamaiti Marite e 22 to'na matahiti tei tapuni ra oia i roto i te pahi mai te êia i to'na haerea na nia i te pahi reva. Tupu ihora te mataú no te mea ua teiaha roa te pahi i te mau ohipa no to ratou tere iho, i teie nei ra e teiaha faahou â tei ore roa i manaóhia e eita atoa e uta maitai. Riri ihora te feia no te pahi no te mea ua haapeapeahia to ratou tere, opua ihora ratou i te tupai ia'na, e ua parau hoi ratou e e taura noa 'tu ia'na i raro, e mea maitai aé te taata hoé ia pohe i te paa-toaraa. I muri'ho ra no te rahi o to ratou tiaturi, ua tamata ratou noa'tu te fifi. No te teiaha roa ra, aita ratou i tae i Pari mai tei manaóhia i te matamua. Ua pao te mori, e no te reira i tapae poto ai ratou i te fenua Paniola, e e piti mahana i muri iho ua tae roa i Pari. Ua faahanahana-rahihia te feia no te pahi no to ratou itoito e te mataú ore. Te pahi reva matamua hoi teie no te Hau Farane tei tae na taua area ra, oia ia, mai te tahi pae miti i te tahi pae miti.

Geo. W. Burbidge Imprimeur,
Rue Brea et de la rue Dumont d'Urville, Orovini, Papeete